



80  
Rom



1. Gracurites f. G. Johan / gottes vorfifungen  
von Christo auß Moſe und allen propheeten  
Lübeck 1550. f. 4.
2. — von Job und der Naamen Jesu Christo  
Lübeck 1550.  
constat 16. ff.
3. — von der Sündfluff.  
Lübeck 1549.
4. — von Zwillingen im Bibe  
Rebecca, Lübeck, 1550
5. — von dem Silah Jesu Christo  
Lübeck 1549.
6. — Das ist Man, Lübeck  
1550.
7. — von dem selb d. C. Lübeck  
1550
8. — von dem Alkan unfrucht  
Gott d. Lübeck, 1550.
9. — von dem vrien Brandopffer.  
Lübeck. 1550.
10. — vom Dyriß offer, Lübeck  
1550.



51

# **L** Ine Dreifaltige Predigt

Des Engel Gabriels. Luce. i.

Am tage der Verkündigung Mariæ  
zu Marburg ausgeleget.

DOCTOR IOANNES  
DRACONITES.

Ich gleybe das **JESVS CHRIVS** Gottes  
Eingeborne Sone/ vom Heiligen Geist empfangen/  
vnd aus Maria der Jungfrauen geboren ist.

**M. S. L.**



# Dem Gottfürchtigen Man Hans Cran: Frid in Christo.

**E**s ist keine bessere weise zupredigen / denn Gabriel meines starcken Gottes Engel in diesem Euangelio führt. Vnd das kein Predigt fruchtbar seie / die nicht diser art ist: scheinet wol dar aus das Maria durch solche dreifaltige weise zupredigen ist bekeret worden / zuglawben / das sie Gottes Mutter werden solt / vnd Gottes wort eingeleistet vnd mensch worden ist. Nun ist je kein geleierter Prediger auff erden komen (ausgenommen des Zimmermans Sone IESVM) denn diser Engel Gabriel. Vnd wird freilich kein mensch leichter zum Christlichen glawben beweget werden / denn Maria die Mutter Gottes: Ich rede wie ein mensch der CHRISTVM liebet. Der Engel Gabriel aber leyt sich vernemen / das Gott der Vatter vnd Gott der Son vnd Gott der heilig Geist samptlich vnd sonderlich an Maria des Messiah Mutter seligkeit wircke. Maria fasset auch einen solchen glawben an Gott den Vatter vnd Gott den Son vnd Gott den heiligen Geist aus diser predigt / das sie durch den blossen glawben an dise predigt / Gottes Sone IESVM vom heiligen Geist entpfienge / vnd waren Menschen gebare. Vnd man höret im Magnificat nicht / das sie ehme von iren wercken vnd verdiensten (als die Gesetzprediger vnd Widderchristen so werck thun die Gott nicht angenehme sind vnd on den glawben CHRISTJ verflucht) sondern alleine vom Gottes barmhertigkeit in CHRISTO versprochen / vnd vom heiligen Geist der solchen glawben in ir vnd allen erweleten wirckt. Summa: Wie die heilige Dreiheit samptlich vnd sonderlich die ganzen Creature geschaffen hat vnd erhalt: nach diesem Spruch psal. 33. Der Himmels ist durchs Wort des Herrn gemacht / vnd alle sein Heeg durch seines Geists mündigkeit vnd seligkeit alleine darumb wircke / das ider man demütig seie für Gott vnd sein leben lang Gott dancke das er sünde vergibe vnd das ewige leben vmbsonst gibt durch CHRISTVM nemlich vmb seiner verheissung willen durch unser glawben / der nicht on gutte wercke ist die Gott selbs wirckt vnd belohnet nach seinem wolgefallen: Als Paulus Phil. 2. zeiget vnd spricht / Gott ist es der in euch wirckt beide das wollen vnd thun / nach seinem wolgefallen. Drum welcher Prediger vnd Christ diser Englischen vnd Marien art ist: nemlich der nicht leret vnd thut / das widder CHRISTJ Neye Testament ist: des gefelle bin ich / wie ps. 119. Engels vnd Marien art nicht ist mit leren vnd glawben (denn am wort vnd glawben ist alle gerechtigkeit vnd seligkeit eines menschen gelegen) sondern fladdert: weil sein glawbe nicht gegründet ist auff Gottes verheissung / vnd derhalben in der not / wie ein WeckBlat vom Bawm gewehet / dahin fellet: des gefelle bin ich nicht / nach diesem Spruch psal. 119. Ich hasse die fladdergeister / vnd liebe dein Geseze.

**Z**war dise predigt / wolt ich nicht alleine darumb an das letzte Capitel Sacharis hengen vnd durch den Druck mit demselben ausgehen lassen / das beide des Engel Gabriels predigt vnd des Propheten Sacharis Capitel auff einen tage von mir ausgeleger sind / nemlich die predigt vormittage für Marggraff Joachim / das Capitel aber nachmittage für den Marcpurgern: Sondern auch das ich deiner Gottseligkeit / allerliebster Cran / als einem Gast / vom aller Hamburger wegen / etwas schencket / damit ich deine liebe beide freündlich enepfienge vnd brüderlich von mir lieffe: weil sonst nichts im Druck war das sobald ferttig werden kund als dis Euangelion / vnd mir nicht wolangestanden were / das ich den getrewen CHRISTJ nicht mit dem Engel Gabriel widerheim geleitet hette. So grüß ich durch meinen liebsten Cran / D. Joannem Aepinum / M. Joachim Westphal / D. Jacob Bording / Dirck Resten Postel / Joachim Kengel / Thomas Copen / vnd alle Hamburger in CHRISTO IESU. Welcher seines Vaters Wort vnd Geist nimmermehr von uns allen nemen / sondern dasselb ewig gut bei uns allen darumb bleiben vnd allezeit walden lassen wolle / das er solchs verheissen hat Esa. 59. da er spricht / Mein geist der bei dir ist vnd meine wortt die ich in deinen mund geleger habe / sollen von deinem munde nicht weichen noch von dem mund deines Samens vnd kindskind von nu an bis in ewigkeit / spricht der HERR.

Geschrieben in der Webe S. Jacobs  
7. Feb. M. D. L.



# Euangelion Luce j. Am tage

## Der Verkündigung Mariae geprediget.



**D**ies Euangelion ist ein lebendiger  
Born Gottes / aus welchem fleißt diser Ar-  
tikel vnser glawbens / **CHXJSTVS** Gottes Sone  
ist vom heiligen Geist in Maria der Jungfrawen warer  
mensch empfangen. Wiewol aber die Euangelion eine  
dreifaltige predigt ist des Engels Gabriels/ Maria der  
Jungfrawen gethan von Gott dem Vatter vnd Gott dem  
Son vnd Gott dem heiligen Geist: so kundte sie doch solche gnadenreiche  
predigt nicht verstehen noch glawben/ die heilige Dreiheit wirckt denn selbs  
in irem hertzen den glawben vnd in irem mund das bekendnis. Denn ir horet/  
erstlich: da Gott der Vatter selbs durch Gabriel Maria grüßet/ das sie er-  
schrickt vnd spricht/ Welch ein Grus ist das: vnd da ir der Engel noch eine  
predigt von Gott dem Sone thut/ wird sie noch irrer vnd spricht/ Wie mag  
das zugehen? weis ich doch von keinem Manne: Summa/ wo Gottes wort  
vnd geist nicht selbs den glawben vnd das bekendnis sampt der Mensch-  
werdung **CHXJSTI** gewirckt hette/ so were Maria keine mutter Gottes  
vnd das Wort nicht Fleisch worden. Hat aber Maria die mutter Gottes  
vnd das Wort nicht selbs durch welchen Gott selbs redet/ aus irem freien willen  
vnd eigen vermügen nicht verstehen noch glawben können: wie solten denn  
ich vnd du/ aus vnserm freien willen vnd eigen vermügen/ dem Euangelio  
glawben vnd darnach leben können/ wenn gleich Gott selbs durch einen mens-  
schen vns prediget/ er wircke denn selbs in vns das er vns prediget: Drum  
bleibes wol also wie geschriben stehet Jo. 6. Niemand kompt zu mir/ mein  
Vater ziehe in denn. Jo. 15. On mich kund ir nichts thun. Ro. 9. Es ligt  
nicht an jemandes wollen oder lauffen/ sondern an Gottes erbarmen. So  
laßt vns die predigt des Engels in drei stücke teilen/ vnd draus lernen: wie  
die heilige dreiheit hie selbs durch den Engel Gabriel Mariam bekeret vnd  
selig macht/ das er vns desgleichen durchs Euangelische predigAmpt  
sampt allen heiligen bekere vnd seligmache.

Im sechsten Mond / ward der Engel Ga-  
briel gesand von Gott/ in eine Stad in Ga-  
lilea die heist Nasareth/ zu einer Jungfra-  
wen die vertrawet war einem Manne/ mit  
namen Joseph/ vom Hause David/ vnd die  
Jungfraw hies Maria.

Vnd der Engel kam zu ir hinein vnd sprach:

B ij

Gegrüßet



**Predigt des Engel Gabriels:**  
**Gegrüßet seiestu Holdselige/der Herr ist mit**  
**dir/ Du gebenedeiete vnter den Weibern.**

**S** Is ist das erste stücke der Englischen predigt von Gott dem vatter/ welcher die seligkeit Maria anseheth/ damit das er sie durch einen Engel selbs grüßet vnd das Euangelion von **CHRISTO** prediget: aber sie kan solcher Göttlichen predigt vnd Englischem grusse nicht gleuben/ sondern erschrickt dafür vnd spricht/ Welch ein grus ist das. So last vns aus diser Göttlichen predigt dreie lere wol fassen: Erstlich/ von der Engel dienst: Darnach/ warumb Gott eine Jungfrawen aus Davids geschlecht zu einer mutter des Messiah genommen: Endlich/ wie Gott Mariam grüßet vnd sie antwortet. Gabriel heist Gottes sterck: vnd weil er in der sachen vnser Seligkeit von Gott wird gesand/ sollen wir von Gabriel vnd allen Engeln also halten/ das sie von Gott vnserm lieben vatter dazu geschafften vnd verordnet seien/ das sie vnser heuptes **CHRISTI** diener seien/ vns zur ewigen seligkeit zubringen: Wie Heb. 1. geschrieben stehet / Es sollen in alle Gottes Engel anbetten: Vnd abermal/ Die Engel sind allzumal dienstbare geister/ aus gesand zum dienst/ vmb dere willen die ererben sollen die seligkeit.

**S** Als er aber spricht (in eine Stad in Galilea die heist Nasareth/ zu einer Jungfrawen die vertrawet war einem Manne mit namen Joseph vom hause David/ vnd die Jungfraw hies Maria) leret vns dreierlei wol merken. Erstlich/ das er darumb Joseph vnd Davids sampt Maria gedencke/ das Gottes verheissunge von **CHRISTO** David gescheen 2. Sa. 7. Ps. 98. erfüllet würden: Denn was die Euangelisten schreiben oder nennen / das sibet hinder sich in das Alt Testament vnd fleußt aus Gottes zusagungen von **CHRISTO**. Zum andern/ das er darumb spreche/ zu einer Jungfrawen/ das Gottes zusagunge von **CHRISTO** erfüllet wurden/ die also klingen. Ge. 3. Des Weibes Samen sol dir den Kopff zutreten. Vnd Jesa. 7. Sihe eine Jungfraw sol schwanger werden. Denn es solt ein wunder auff erden gescheen/ des gleichen nie gehört noch hernach gescheen solt/ nemlich/ das eine Jungfraw on man/ den Messiah vom heiligen Geist entpfahen/ vnd waren menschen geberer solt. Zum dritten/ das er darumb spreche/ die vertrawet war einem manne / weil die heilige Dreiheit mit souiel gebotten vnd auch mit disem wunder den Ehestand geehret vnd bestetiget hat / das wir vns auch nicht schemen/ den Ehestand für den besten Göttlichsten Christlichen auff erden zuhalten: Wie Paulus auch spricht 1. Cor. 7. Von der Jungfrawschafft hab ich kein gebot des Herrn: Vnd 1. Ti. 4. spricht er/ Es seien Teuffels Lerer so die Ehe verpieten. Nu dise dreie lere sind dahin gericht/ das wir lernen/ wo zu vns die lieben Engel nütze seien/ vnd warumb Gott von himel zu Maria der Jungfrawen gesand habe. Last vns aus dem grusse des Engels auch dreie lere schepffen: Denn was in disem Euangelio geprediget wird/ das ist alles Göttlicher Dreiheit voll.

**E**rstlich spricht der Engel: Gegrüßet seiestu Holdselige. Ist mir das nicht ein gros wunder/ von keiner zungen aus/prechlich/ das der ewig vnd Allerhöchist Gott/ nicht alleine sein allmechtig wort eines sterblichen menschen



## Am tage der Verkündigung Maria.

menschen vnseeligkeit anziehen lest/auff das er die sterblichen menschen zu vns sterblichen Göttern mache/ sondern auch das er den niedrigsten menschen zu einer mutter des Messiah erwelet vnd so freündlich grüßet/ das sie durch diesen grus heilig vnd vnsterblich worden ist/ also/ das sie billich springet vnd singet/ Er hat die nidrickeit seiner Magd angesehen/ von nu an werden mich selig preisen alle kinds kind: denn er hat grosse ding an mir gethan/ der da mechtig ist/ vnd des Name heilig ist.

**D**arnach spricht er: Der Herr ist mit dir: wil souiel sagen/ das Wort Gottes so mit dir redet/ wird fleisch vnd mensch von dir werden/ alle welt durch dieses fleisches sterben vnd auffstehen / zuerlösen: Wie Jo. 1. spricht/ Das Wort ist fleisch worden/ vnd wonet vnter vns/ vnd wir haben seine herlickeit gesehen / eine herlickeit als eines Eingebornen Sones vom vatter/ voller gnad vnd warheit.

**D**um dritten spricht er: Du gebenedeierte vnter den Weibern: anzuzeigen/ das Maria die seie die von ewigkeit dazu erwelet seie/ das sie des Messiah mutter seie/ davon er des Weibes Samen genennet seie Ge. 3. So wil er auch mit diesem grusse leren: gleich wie Maria/ aus lautter gnaden vnd wale Gottes des vatters so ir durch den Engel CHRISTVM verheisset/ **CHRIST** mutter vnd selig ward: also ist eine lauttere wal vnd gnad/ das Gott der vatter/ durch seine lieben Prediger/ mit vnd dir verdampfen helfen nach dem gesetz/ das ewige leben zusaget/ on alle verdienst / durch den blossen glawben an Gottes vnd CHRISTI zusagunge: Wie Paulus Eph. 2. auch zeüget da er spricht/ Aus gnaden seit ir selig worden/ durch den glawben/ vnd dasselb nicht aus euch/ Gottes gab ist/ nicht aus den wercken/auff das sich nicht jemand rhüme.

**W**as sol ich aber daraus lernen/ das Maria fur des Engels grus erschricke vnd spricht/ Welch ein grus ist das: Gottes wort pfleget alle menschen darumb zuschrecken/wenn sie es hören/ das sie ire nichtrickeit erkennen vnd gnade begeren/ vnd wenn sie Gott hat getröstet/ das sie darnach mit freuden singen vnd Gott dancken: Wie Maria das Magnificat gesungen vnd Gott gedanckt hat. Also ward auch Anna mit erst betrübet/ vnd darnach so frölich das sie sange. 1. Sa. 2. Der Herr macht arm vnd reich/ Er tödter vnd macht lebendig/ er stößt zur hellen vnd füret wider eraus. Esa. 66. Ich sehe an den elenden/ der zubrochens geists ist/ vnd der sich fur meinem Wort fürchtet. Dis seie anug vom ersten stücke der Englischen predigt: Last vns hören das ander stücke/ nemlich wie der Engel selbs den göttlichen grus ausleget (ob wir zu kurz hindurch giengen) vnd Mariam tröstet.

**U**nd der Engel sprach zu ir / Fürcht dich nicht Maria / du hast gnade bei Gott funden. Sibe du wirst schwanger werden im leibe/ vnd einen Sone geben / des Namen soltu **JESVS** heissen. Der wird gross  
B iij vnd ein



## Predigt des Engel Gabriels:

vnd ein Sone des Höhsten genennet werden. Vnd Gott der Herr wird im den stuel seines Vatters Dauids geben / vnd er wird ein König sein vber das Haus Jacob ewiglich / vnd seines König Reichs wird kein ende sein.

**S**ie ist das ander stücke der Englischen predigt von Gott dem Sone / in welchem Gottes des Vatters grus oder Euangelion von CHRISTO dreifaltiglich vnd so ausgeleget wird / das der Engel: erstlich Mariam tröstet / vnd anzeigt warumb sie Gottes Mutter erwelet sei: zum andern wie sie Gottes Son entpfahen vnd geben werde: zum dritten wie Gottes Sone der Messiah ein geistlicher vnd ewiger König sein werde. Aber Maria kan solchs auch nicht verstehen noch glauben: denn sie spricht / Wie mag das zugehen? Weis ich doch von keinem Manne.

**D**arumb spricht der Engel: Fürcht dich nicht: das wir lernen / wie das Euangelion nur den erschrockenen geprediget werden sol. Als den Jüden am berge Sinai. Deut. 18. Den solt ir hören: vnd die erschrocken Hirten in der Christnacht. Lu. 2. Fürchtet euch nicht / Sihe ich verkündige euch grosse freude. Gnade bei Gott finden / heist / aus lautter gnaden von Gott erwelet vnd on verdienst selig gemacht werden. Drumb wil der Engel zu Maria / nicht alleine darumb sagen (Fürcht dich nicht: denn du hast gnade bei Gott funden) das sie nur getrost sei / vnd ir Magnificat singe mit freuden / weil sie Gott aus lautter gnaden on ir verdienst zu einer Mutter Gottes erwelet vnd selig gemacht habe / sondern auch das er mich vnd dich lere / darumb frölich sein in Gott / vnd den 103. Psalm getrost singen / das wir in **CHRISTO** bei Gott das ewigleben vnd ewige vergebung aller Sünde so gewis haben / als Gott lebet vnd Maria des Messiah Mutter ist.

**W**ie diesen wortten aber (sihe du wirst schwanger werden im leibe / vnd einen Sone geben / des Namen soltu **JESVS** heissen) leget er den Englischen grus recht aus / vnd wil anzeigen / das **CHRISTVS** nicht alleine ein warer vnd natürlicher Sone Marie der Jungfrawen / sondern auch ein ewiger vnd allmechtiger Son Gottes sein werde / der alle welt segnen werde: als denn Abraham versprochen Ge. 22. Denn **JESVM** heissen / ist ein solcher menschen vnd Gott zugleich sein / der alles was Gott je verheissen aller welt guttes zugeben durch sein sterben vnd aufferstehen erwerbe / vnd durchs Euangelion allen glewbigen schencke: Wie Paulus auch Ro. 8. spricht / Gott hat vns alles in **CHRISTO** geschenkt: Vnd 2 Cor. 1. spricht er / Er habe den Corinthern einen solchen **CHRISTVM** geprediget / in dem alle Gottes verheissung Amen vnd Ja seien. Drumb wie diese wortte (du wirst einen Son geben) **CHRIST** menscheit betreffen / welche mit irem Tod / mir vnd dir ewige vergebung aller Sünd erworben / durch dem blossen



## Am tage der Verkündigung Mariæ.

bloffen glawben an Gottes vnd CHRISTI zusagunge von CHRISTI leiden vnd Tod gestellet. Also betreffen dise wortte (vnd er sol **JESVS** heissen/ gros werden/ vnd ein Sone des Höchsten genennet werden) **CHRISTUS** Gottheit/ welche mit der Auferstehung/ allen Christglaubigen ewige gerechtigkeit vnd seligkeit erworben hat: Als er selbs spricht **hose. 13. Tod/ ich bin deine plage: Ich wil sie vom Tod erlösen.**

Was aber das eingefleischte wortte Gottes der Mensch **JESVS CHRISTUS** für ein dreifaltig Königreich haben werde/ zeigt der Engel an mit disen wortten: Vnd Gott der Herr wird im den stuel seines Vatters Dauids geben. Denn das er spricht (vnd Gott der Herr wird im den stuel seines vatters Dauids geben) leret vns/ das **CHRISTUS** nicht alleine nach gottes verheissungen David gescheen/ vom geschlecht David geboren werden vnd regiren solle/ sondern auch das er solch Regiment durch sterben vnd auferstehen anfahren vnd mit dem Euangelio treiben werde: als er selbs zeüget **Lu. 24.** da er spricht/ **Es mus alles erfüllet werden/ das von mir geschrieben ist in den Propheten vnd in psalmen: Denn CHRISTUS** musste leiden vnd am dritten Tage auferstehen/ vnd predigen lassen in seinem Namen Bus vnd vergebung der Sünd.

Hieraus ist offenbar/ das er mit disen wortten (vnd er wird ein König sein vber das haus Jacob ewiglich) leren wolle/ das **CHRISTUS** ein Euangelischer Prediger vnd geistlicher König sein werde/ der alle die so glawben an **CHRISTUM** Jacob verheissen. **Ge. 28.** Wie Jacob/ vom Sünd Tod Tüffel hell erlösen/ vnd das ewigleben geben/ wolle. Durchs hause Jacob/ verstehe die Christenheit/ auff die verheissung Jacob gescheen/ vnd geprediget von den Aposteln/ gegründet: Wie Paulus auch spricht **Eph. 1.** Ir seit erbawet auff der Apostel vnd Propheten grund/ da **CHRISTUS JESVS** der Eckstein ist.

So wil er mit disen wortten (vnd seines Königreichs wird kein ende sein) nicht alleine leren/ das **CHRISTUS** von Maria geboren ein geistlicher vnd ewiger König vber alles sein werde bis an Jüngsten Tag/ nach dem **psal. 110.** damit der Jüden Königreich vnd priesterthum gar auffgegeben werde. Sondern auch das alle Christglaubigen/ durch den bloffen glawben an **CHRISTUM**/ ewige gerechtigkeit vnd seligkeit haben sollen/ also das sie am Jüngsten Tag/ als **CHRISTUS** Reich von **CHRISTO** Gott vberantwortet vnd **CHRISTO** ehlich/ bei Gott im himelreich ewigleben sollen: Wie Paulus auch **1. Cor. 15.** gewaltiglich zeüget.

Jewel aber der Engel mit diser andern predigt/ nicht alleine die erste predigt verkleret/ sondern auch alles auff einen hauffen treget/ das in der gangen Schrift von **CHRISTUS** geistlichem vnd ewigem Königreich geschrieben: dennoch verstehers Maria noch nicht/ sondern spricht/ Wie mag das zugehen? Weis ich doch von keinem manne. Diweil aber Gott selbs spricht/ Meine gedancken sind so ferne von ewren gedancken/ als himel vnd Erden von einander sind: Was istts wunder das sich ein einfaltiges Meidlin in dises Engels göttliche predigt nicht schicken kan? Sintemal  
B ijij auch



## Predigt des Engel Gabriels.

auch Maria sahe/ das es seer vbel im lande stund/ vnd beide König Reich/ vnd PriesterThum in der aschen lagen: Wie Ge. 49. geweissaget. Dazu war es wider alle vernunfft vnd die ganze nature/ das eine Jungfraw solt geben einen solchen menschen/ on manne/ der zu gleich des allerhöhisten Gottes vnd eines Menschen Sone were. Gewislich felets Maria an nichts anders solche treffenliche predigt zuverstehen/ denn des heiligen geists welcher sie verstehen vnd glewen leret disen Spruch Jesa. ii. Es wird eine Rute auffgehen aus dem Stam Isai/ vnd ein zweig aus seiner Wurtzel frucht bringen. Drumb lest sich der Engel Maria schwachenglawben nicht irren/ sondern feret iner fort mit predigen/ vnd zeigt an/ der heilige geist müsse nicht alleine sie leren dise predigt glewen/ sondern auch den ganzen handel der Menschwerdung des Messiah auerichten: Wie folget.

Der Engel antworttet vnd sprach zu ir. Der heilig Geist wird ober dich komen/ vnd die krafft des Höhisten wird dich berschatten. Darumb auch das Heilige das von dir geboren wird/ wird Gottes Sone genennet werden. Vnd sihe Elisabeth deine gefreundte ist auch schwanger mit einem Sone in irem alter/ vnd gehet itzt im sechsten Mond/ die im geschrei ist das sie vnfruchtbar seie. Denn bei Gott ist kein ding vnmöglich. Maria aber sprach: Sihe/ ich bin des Herrn Magd/ mir geschee/ wie du gesagt hast. Vnd der Engel schiede von ir

Es ist das Dritte Stücke der Englischen Predigt von Gott dem heiligen geist/ in welcher der Engel abermal ein dreifaltiges geheimnis anzeigt: Erstlich/ das Gott der heilig geist selbs auerichten werde/ das sie von Gott dem Vater vnd Gott dem Sone gehört hat: Darnach/ wie der Mensch CHRISTVS von Maria geborn/ Gottes Son vnd on Sünde sein werde: Zum dritten/ wie Elisabeth mit Joanne schwanger gehe/ welches nach der nature zurechen auch vnmöglich war/ Alles aber was Gott redet/ das könne er auch thun. Sihe/ mit diser predigt feret der heilig geist ins hertz/ vnd macht das Maria glewet vnd bekennet/ vnd Gottes Worte fleisch



## Am tage der Verkündigung Marie.

Fleisch wird/ auff das wir durch solch Exempel lerneten: gleich wie Maria sobald Gottes mutter ward/ als sie des Engels predigt glawbet vnd bekennet/ das wir auch sobald Gottes kinder vnd erben werden/ als wir gottes verheissunge von **CHRISTO** glawben vnd bekennen: Wie Jo. 1. geschriben stehet/ Er gibt den macht gottes kinder zu werden / die da glawben an seinen Namen.

**D**en heiligen geist vber dich komen/ heist/ den heiligen geist durchs Euangelion ins hertz komen/ vnd nicht alleine den glawben an gottes verheissunge wirken/ sondern auch alles das ausrichten so Gott bevilhet vnd verheisset: Wie **CHRISTVS** Jo. 16. des heiligen geists Ampt beschreibet. Die krafft des Höhsten vberschatten/ ist nach Hebreischer weise gered/ barmhertzigkeit erzeigen: Wie Jesa. 4. Es wird eine Hütten sein zum schatten des tages für die hitze. So wil er mit disen wortten (der heilig geist wird vber dich komen/ vnd die krafft des Höhsten wird dich vberschatten) souiel leren. Gleich wie Gott der heilig geist/ die ganze Creature von Gott dem Vatter durch Gott den Sone geschaffen/ mütterig vnd thettig mache: nach diesem Spruch Ps. 33. Der Himmel ist durchs Wortte des Herrn gemacht/ vnd alle sein Heer durch seines geistes mund. Also was Gott der Vatter die durch den Engel Gabriel von Gott dem Sone bevilhet vnd verheisset/ das richtet Gott der heilig geist auff dise weise in Maria leib vnd sele aus/ das er erstlich den glawben an dise predigt in Maria Selen wirckt/ vnd darnach gottes Wortte einfleischt vnd von Maria fleisch vnd blut alleine nimpt/ daraus der mensch natürlicher weise gebildet vnd geboren werde/ den die Schrift des Weibes Samen darumb nennet/ das er on zuthun eines Mannes von einer Jungfrawen geboren ist. Gal. 4. Nicht anders handelt die heilige Dreiheit samptlich vnd sonderlich alle menschen zubekeren vnd selig zumachen: das Paulus billich spricht/ Die gottes geist treibet/ die sind gottes kinder: die aber **CHRIST** geist nicht haben/ die sind nicht sein.

**H**eraus ist klar/ das er mit disen wortten (darumb auch das Heilige das von dir geboren wird/ wird gottes Sone genennet werden) nicht alleine die zwo Naturen der andern persone der Heiligen Dreiheit anzeigen wolle/ also das Messiah warer gottes vnd warer Marie beider natürlicher Sone genennet mag werden: sondern auch das der Mensch **CHRISTVS** alle zeit gottes willen erfüllet hat. Ps. 41. Vnd sein lebenslang nie gedacht oder gethan/ das widder Gott were gewesen Jesa. 53. Solchs betreffiget auch Matth. 1. da er spricht/ Das in Maria geboren ist/ das ist von dem heiligen geist.

**D**as er aber spricht (Sih/ Elisabeth deine gefreündte ist auch schwanger mit einem Sone in irem alter vnd gehet igt im sechsten Mond/ die im geschrei ist das sie vnfruchtbar seie) ist eine kunst des Engels zuleren/ nemlich mit Exempeln zum glawben bewegen: als wolt er sagen/ Ist's Gott möglich einen alten erstorbenen vnfruchtbar leib/ als Sara vnd Elisabeth leibe/ schwanger vnd fruchtbar zumachen/ welches doch wider alle nature ist: solt er denn nicht auch deinen jungen leib/ on einen Man/ wider die nature/ schwanger vnd fruchtbar machen können: Hat er nicht durchs wortte  
aus



## Predigt des Engel Gabriels.

aus nichts Himmel vnd Erden geschaffen: steht nicht geschrieben / wenn er spricht / so geschichtes?

**S**umb wil er mit disen wortten (denn bei Gott ist kein ding vnmöglich) in der Summa leren / weil Gott thun kan was er gered / vnd dem ruffen kan das nicht ist das es seie (wie Paulus spricht Ro. 4.) So gepüre es allen menschen / nicht alleine Maria / gottes Wort einfaltiglich anzubetten / festiglich zugleuben vnd gar nicht zueineln es seie wie Gott rede / vnd werde gescheen wie er rede / auch gar nicht zuzorschen mit der vernunft wie es zugehen müge. Solche grosse kunst alle heilige Schrift zuuerstehen gleuben vnd auslegen / leret der Prophet Habacuc alle Christen / da er spricht im andern Capitel / Die weissagung wird ja noch erfüllet werden zu seiner zeit / vnd wird endlich frei an tag komen vnd nicht aussen bleiben: ob sie aber verzeucht / so harre ir / sie wird gewislich komen vnd nicht verziehen. Wer aber halstarrig ist / der wird keine ruge in seinem herzen haben: Denn der gerechte lebet seines glawbens.

**S**ihe / da Maria höret das Gott der heilig geist anrichten werde das der Engel von Gott dem Vatter vnd Gott dem Sone geprediget / vnd das Elisabeth auch schwanger seie / Summa / was Gott verheisse das müsse gescheen: feret Gott der heilig geist mit gottes Wort in sie / vnd macht nicht alleine Maria hertz vnd mund gleuben vnd sagen: Sihe / ich bin des Herrn Magd / mir geschee wie du gesagt hast: Sondern macht auch gottes Wort fleisch / nemlich das wir sind / auff das wir durch in würden das er ist: Wie Paulus zeüget / da er spricht 2. Cor. 5. Wir bitten an **E H X I S T I** / laßt euch versünen mit Gott: Denn er hat dene so von keiner Sünde wußte / für vns zur Sünde gemacht / auff das wir in im würden die gerechtigkeit die für Gott gilt.

## Schlußrede.

**L**ast vns für diese dreifaltige Predigt des Engels Gabriels / der heilige Dreieit / auch dreifaltigen danck sagen / vnd das Vater vnser darumb von hertzen betten / das sie auch dreifaltigen nutz an vnsern leib vnd selen zeitlich vnd ewiglich bringe. Zum ersten / laßt vns Gott vnserm lieben Vatter ewigen danck sagen / das er sein heiliges Wort darumb hat fleisch werden lassen / das er seine gottheit mit vnser menscheit vereiniget in ewigkeit: als Hose. 2. zeüget / vnd Maria billich singet / Gott dencket der barmhertzigkeit vnd hilfft seinem Diener Israel auff / wie er gered hat vnsern Vatern Abraham vnd seinem Samen ewiglich. Zum andern / laßt vns Gott dem Sone dancken / das er vnser ewiger König worden ist darumb / das wir mit leib vnd sele sein eigen seien in ewigkeit: als der ander Psalm zeüget vnd von mir vnd dir sampt allen heiligen spricht / Ich wil dir die Heiden zum erbe geben / vnd der welt ende zum Eigenthum. Zum dritten /



## Am tage der Verkündigung Marie.

dritten / last vns auch Gott dem heiligen geist dancken / das er vns nicht als  
leine regiret in diesem Jamertal vnd versichert des das wir Gottes kinder  
vnd erben seien brüder vnd mitterben **CHRIST** / Sondern auch das er  
vns von Todten auffwecken vnd **CHRIST** leib ehnlich machen wirds  
als Paulus auch zeiget / da er spricht. Ro. 8. So der geist des der **JESU**  
von Todten auffweckt hat in euch wonet / so wird auch derselbige der  
**CHRIST** von den Todten auffweckt hat / ewre sterb-  
liche leibe lebendig machen / vmb des willen das  
sein Geist in euch wonet.

### Bettet.

**W**ir bitten dich Allerliebster Vatter / vmb deiner  
gnedigen verheissunge willen / das du vns armen Sündern  
allezeit gesandte Prediger dein heiliges Wort so rein ver-  
kündigen lassst / als der Engel Gabriel der Jungfrawen  
Maria dein Wort verkündiget. Vnd wie sich der Engel  
nicht irren lies das Maria schwachglaubig war vnd  
sprach / Welch ein grus ist das / sondern prediget fort vnd leret sie **CHRIST**  
mit Gottes verheissungen erkennen : also las sich deine Prediger des  
erbarmen / das wir so jemerlich vom fluch des Gesetzes zuschlagen vnd leider  
allzuschwachglaubig sind dich auff alle deine verheissung anzuruffen / vnd  
las sie deinem namen zuehren / vns viel leichter alles was du von **CHRIST**  
vnsers hertzen einigen trost vnd ewigen Schaze verkündigen zur ewigen  
gerechtigkeit vnd seligkeit / denn alle Menschenlerer weis ich nicht was predi-  
gen / das in not vnd tod nicht bestehen wird : als **CHRISTVS** Matth.  
13. spricht / Menschenlerer dienen mir vergeblich. Sintemal aber die  
beste predigt gar nichts hilfft / wenn dein geist nicht durchs Wort ins hertz  
kompt vnd wirckt beide den glauben der alleine gerecht macht für dir / vnd  
werck der liebe die gerechtmachen für den Menschen : So wollest vns auch  
zum wort deine krafft geben / nemlich den heiligen Geist / wie Marien / auff  
das wir nicht zueueln am Wort / als Maria sprach / Wie mag das zugehen ?  
Sondern zum Wort Amen sprechen / wie Maria sprach / Mir geschee wie  
du gesagt hast. Bei dir gilt nichts denn gnad in **CHRISTO** verspro-  
chen : vnd ist kein ding bei dir vnmöglich. Drumb bitten wir dich lieber  
Vatter im Namen **CHRIST** durch deinen Geist vmb erfüllung  
deiner verheissung an vns / wie Maria begeret / auff das wir deinen  
dreifaltigen vnd einigen Namen / vnser Gott / preisen mügen  
vnser lebenlang / Wie Maria das Magnificat singet /  
vnd nach diesem Jamertal bei dir **CHRIST**  
leib ehnlich wie Maria leben im  
Himmelreich jmer vnd ewiglich.  
A M E N.

Gedruckt durch Georgan Richolff:

M. D. L.








88 153

AB 88 153

X 199 7507

3







nd: Jesu Christo.

sen wortten (welches geschlecht



**L**ine Dreifaltige Predige

Des Engel Gabriels. Luce. i.

Am tage der Verkündigung Mariae  
zu Marburg ausgeleget.

DOCTOR IOANNES  
DRACONITES.

Ich gleybe das **JESVS CHRIVS** Gottes  
Eingeborne Sone/ vom Heiligen Geist empfangen/  
vnd aus Maria der Jungfrauen geborn ist.

M. S. L.

Line drei

